

Yenjelé yon senre yofɔ

MALAKI

wi sewe we

Sewe wi nawa senre

Malaki wìla pye na Yenjelé li senre ti yuun maga ta ki sanga wi ni Yenjelé li woolo pè yiri wa kulowo pi ni, ma sɔngɔrɔ wa Zheruzalemu ca makɔ. Azhe naa Zakari pàa Yenjelé senre nda yo, leele pàa ti logo, ma Yenjelé li shérigo gbɔgɔ ki kan naa fɔnnjɔ. Ko sanga wo ni, kila yala Esidirasi naa Nehemi pe fa yiri wa kulowo pi ni mbe sɔngɔrɔ wa pe tara. Pàa shérigo gbɔgɔ ki kan, eен fɔ leele pe sila pye na Yenjelé li gbogo, paa yegɛ ñga na ki daga mbaa piin we. Saara wɔsanga wi ka gbɔn, yaayoro nda pè yu, naa nda ti jegele kè jɔgɔjɔgɔ konaa nda ti yen na yaa, to pe maa woo saraga. Saraga wɔfenne paa daga mbaa Yenjelé li woolo pe yegɛ sinni yegɛ ñga na, pe sila ko pye, eен fɔ pàa pe puŋgo, ma pe wɔ wa konɔ sinne li ni. Nambala pàa pye na pe jeele pe waa, na tara ta yegɛ jeele pori pe jeele. Malaki wìla pye na kotogo nii leele pe ni, ma yo pe pe kapere ti jen peri yaga, pe pe yon finliwé pi le naa Yenjelé li ni konaa mbaa li tasaga ki kaan li yeri. Yawe Yenjelé li yaa li pitunjɔ wi torogo wi sa kitit kɔn li woolo pe na. Malaki mege ki kɔrɔ wowi ña «Na pitunjɔ». Yenjelé làa yo fɔ:

Wele, mi yen nala pitunjɔ wi torogi,

wi yaa sanla konɔ li gbegele na kan wa na yegɛ.

*Yawe Yenjelé na ye yen na lagajaa, li yaa pan mbe ye wa li shérigo gbɔgɔ
ki ni mbe ye fo.*

*Pitunjɔ ña wi yaa yon finliwé pi senre yo, a yaa wi jaa mboo yan, wi yaa
pan (Mala 3.1).*

Sewe wi yen ma kɔɔnlɔ yegɛ ñga na

Leele pàa puŋgo ma laga Yenjelé li na 1.1--2.16

Yenjelé li yaa ka kitit kɔn li woolo pe na konaa mbe duwaw pe na 2.17--3.24

**Yenjèle lì yo Izirayeli woolo
pe yen mali ndanla**

1 ¹Senre[†] nda to Yawe Yenjèle lìa kan li yɔn senre yofɔ Malaki[†] wi yeri, a wìri yo Izirayeli woolo pe kan.

² Yawe Yenjèle lì yo fɔ: «Ye yen mala ndanla.»

ɛen fɔ, a ye nɛe yuun fɔ: «Yinji kigi naga ma yo we yen mɔɔ ndanla?»

Yawe Yenjèle li yo fɔ: «Naga yen ma, Ezawu wi sila pye Zhakɔbu wi ndɔ wi le? Konaa ki ni fuun, Zhakɔbu wo yen mala ndanla, ³a mì je Ezawu wo na. A mùu yanwira wasege ki jɔgɔ, ma ko ɔga ki yen wi kɔrɔgɔ ki yaga waga, a kì pye dabaala mbele wa gbinri* wi ni pe censaga[†].»

⁴ Edɔmu[†] tara woolo pe mbe ya mbege yo fɔ: «Pè we cara ti tɔngɔ; ɛen fɔ konaa ki ni fuun, we yaa sɔngɔrɔ mbe katara ti kan naa fɔnɔngɔ.» ɛen fɔ Yawe Yenjèle na yawa pi ni fuun fɔ, pa lì yo yɛen fɔ: «Na paga ti kan naa fɔnɔngɔ, pa mi yaa ti tɔngɔ naa. Pa kona leeple pe yaa la para pe senre na, mbaa yuun

fɔ: «Ki tara nda ti woolo pe yen ma pe. Pe yen cenle na Yawe Yenjèle lì nawa ɔgban pe ni fɔ sanga pyew.»

⁵ «Pa yoro jate ye yaa ki yan yenle ni, mbege yo fɔ: «Yawe Yenjèle li yen ma gbɔgɔ, ali wa tara sannda nda ti woro Izirayeli tara ti ni[†].»

**Saraga wɔfenne pe sila pye na
Yawe Yenjèle li gbogo
paa yege ɔga na kila daga**

⁶ Yawe Yenjèle na yawa pi ni fuun fɔ li yen naga yuun saraga wɔfenne* pe kan fɔ: «Pinambyɔ maa wi to wi gbogo, kulo maa wi tafɔ wi gbogo. Na ki ka pye mi yen ye to, gbɔgɔwɔ mba yaa na gbogo pi yen se yeri? Na ki ka pye mi yen ye tafɔ, fyere nda yaa fyε na yege to yen se yeri? Yoro saraga wɔfenne wele, ye yen nala mege ki tifaga. Konaa ki ni fuun, ye yen na yuun fɔ: «We yen nɔɔ mege ki tifaga mele?»

⁷ Ye yen naga tifaga, naa yaa paan fyɔngɔ yaakara ni nari woo saraga* wa na saraga wɔsaga* ki na we. Konaa ki ni fuun, ye yen na yuun fɔ: «Wɔɔn mege ki jɔgɔ mele?» Yègɔ jɔgɔ, naa ye yen na yuun fɔ: «Yawe Yenjèle li saraga wɔsaga kii daga

^{†1.1:} Ki senre nda ti lesaga ki yen naga nari fɔ ti yen paa tuguro yen pitunyɔ wi go na, nda wi daga mbe yo. Ki senre ti yen sɔbe senre.

^{†1.1:} Eburuye senre ti ni, Malaki mege ki kɔrɔ wowi ɔga «na pitunyɔ».

^{†1.2-3:} Orɔmu 9.13.

^{†1.4:} Edɔmu cenle woolo poro nungba poro pe yen Ezawu wi setirige piile wele.

^{†1.2-5:} Yenjèle lìa li ndanlawa pi naga Izirayeli woolo pe na, ma ti pàa pye kulolo tara nda ni, a pè yiri wa ma sɔngɔrɔ ma pan wa pe tara, na pe cara ti kanni. ɛen fɔ Edɔmu cenle woolo poro na, Malaki wila ki yan fɔ poro sila ya sɔngɔrɔ mbe sa pe yinre ti kan. A cengelé kele yege pan ma cen wa pe tara ti ni. Poro la wele Larabuye wele (Eza 34.5-17; 63.1-6; Zhere 49.7-22; Eze 25.12-14; 35.1-15; Amɔ 1.11-12; Abi 1-14).

mbaa jate yaraga ka.⁸ Na yaga pan yaayogo ḥga kì fun ki ni mbege wɔ na yeri saraga, ko woro tipege le? Na yaga pan yaayogo ḥga kila sege nakoma na yaa ki ni, mbege wɔ na yeri saraga, ko woro tipege le? Na yaga ki kan ye tara ti to wi yeri, ki mboo ndanla? Wi mbe yenle mbe kajenje pye ye kan[†]?» Yawe Yenjelé na yawa pi ni fuun fɔ, lo lì yo ma.

⁹ «Ko pyenjolo, yè pan na mi ḥja Yenjelé na yenri ḥgbanga mbe yinme tirige ye na. Saraga cenle ḥga yè pan ki ni yeeen, ye nawa po ni, mi yaa logo ye yeri mbe kajenje pye ye kan wi le?» Yawe Yenjelé na yawa pi ni fuun fɔ, lo lì yo ma.

¹⁰ «Ki pye ndee ye ni, nunjba saa shērigo gbɔgɔ* kɔɔrɔ ti tɔnnɔ, ki mbe janla ndanla. Kona, pa ye se ta saa kasɔn muni[†] wa na saraga wɔsaga ki na jaga, mbaa saara sori wa na mege ni. Mi se yenle ye yarikanga ki na.» Yawe Yenjelé na yawa pi ni fuun fɔ, lo lì yo ma. ¹¹ Yawe Yenjelé na yawa pi ni fuun fɔ, lo lì yo ma fɔ: «Mbege le wa yɔnlɔ yirisaga, fɔ saga wa wa yɔnlɔ tosaga, na mege ki yen

ma gbɔgɔ cengele woolo pe sɔgɔwɔ. Lagapyew dunruya wi ni, pe yen na wusuna nuwɔ taan* sori[†], na saara nda ti yen fyɔngɔ fu ti woo nala sɔnni; katugu na mege ki yen ma gbɔgɔ cengele woolo pe sɔgɔwɔ. ¹² Eén fɔ, yoro wo na, ye yen nala mege ki jogo, naa yaa yuun fɔ: «We Fɔ wi saraga wɔsaga ki yen fyɔngɔ ni, saara yaakara nda ti yen na woo wa ki na, ti woro na jate yaraga ka.» ¹³ Ye yen na yuun fɔ: «Yijgi tege ḥga we na! Ki pye ma, saraga wɔsaga ki yen ma ye mbɛn. Yawe Yenjelé na yawa pi ni fuun fɔ, lo lì yo ma. Yaayoro nda pè yu, naa nda ti yen na sege konaa nda ti yen na yaa, to ye yen na paan na kaan na yeri; to ti yen ye yarikanra nda ye yen na paan ti ni. Ye nawa po ni, mi yaa yenle ti na wi le? Yawe Yenjelé lo lì yo ma[†]. ¹⁴ Danga yen javafɔ wi wogo, wo ḥja simbapɔlɔ tiyɔɔn yen wa wi yaayoro ḥbbelege ki ni, a wì yɔn fɔlɔ* le mboo kan na yeri, eén fɔ wii suu kan; mee pan yaayogo ḥga ki yen jeregisaga ni ki ni, mbege wɔ saraga mi ḥja ye Fɔ na yeri. Ye daga mbege jen fɔ mi yen wunlungbɔɔ, mi Yawe Yenjelé na

^{†1.7-8:} Ki yaakara tìla pye fyɔngɔ yaakara, katugu pe sila ki saara ti wɔ we Fɔ wi yeri mbe yala ti wɔmɔ kologo ki ni (Levi 22.17-30; Dete 15.21).

^{†1.10:} Kila pye faa, yaayoro nda Zhufuye pàa pye na woo saara Yawe Yenjelé li yeri, pàa pye nari gbɔɔ sori wa saraga wɔsaga ki na. Saraga wɔfenne poro tunjgo layi mbe kasɔn ki gberi wa ki na.

^{†1.11:} Wusuna nuwɔ taan wi sogowo pìla pye kappyege ka, ḥga pàa pye na piin na Yenjelé li gbogo.

^{†1.12-13:} Saraga wɔfenne poro pàa daga mbaa jege saara yaayoro nda ti sila pye ma yɔn ti na. Eén fɔ pàa pye na fye leeple pe na, nee yenlegi yaayoro tijangara ti na. Ki pyelɔmɔ pi na ma, pe sila pye na Yenjelé li jate, mee sɔngɔrɔ naga yuun ma yo fɔ pe tunjgo ki yen tege ni pe go na.

yawa pi ni fuun fɔ, muwi mì yo ma; a cengele woolo paa fye na yegɛ.»

Yerewe senre nda tila kan saraga wɔfenne pe yeri

2 ¹Koni, ki ŋgasele na li yen na kaan yoro saraga wɔfenne* yoro yeri. ²Yawe Yenjɛle na yawa pi ni fuun fɔ, pa lì yo yeen fɔ: «Na yee yenle mbaa nuru na yeri, na yee yenle mbaa na gbogo wa ye kotogo na, pa mi yaa ye daŋga. Mi yaa ye duwaw wi kanjga mboo pye daŋga. Ee, mi yaa wi pye daŋga; katugu ye ni, wa kpe woro nala gbogo wa wi kotogo na. ³Ye wele, na ye sigi yingiwɛ jen, mi yaa ye setirige piile pe tɔngɔ. Yoro wo na, ye yaayoro saara* nda ye maa woo ye sherege feti piliye yi na, mi yaa ti fire ti tege mbe ye yere ti fa ti ni. Pe yaa ka yoro naa to ni ye koli mbe kari ye ni[†]. ⁴Pa kona ye yaa ki jen mbe yo muwi mìgi ŋgasele na li kan ye yeri, jaŋgo yɔn finliwe* mba mìla le Levi[†] wi ni, pi koro wa pi yɔnɔ suyi.» Yawe Yenjɛle na yawa pi ni fuun fɔ lo lì yo ma.

⁵«Yɔn finliwe mba mìla le Levi wi ni, pi yen mbe yinwege naa yeyinŋe kan. Mìri kan wi yeri, jaŋgo wila fye na yegɛ. Wila si fye na yegɛ konaa na seri na yegɛ[†].

⁶Kaselege nagawa senre wila pye na yuun wa wi yɔn. Kambasinge senre kpe sila yiri wa wi yɔn. Wila wi yinwege ki pye na ni yeyinŋe naa kasinŋe ni. Wila ti, a lelegere kanjga ma laga pe tipere ti na.

⁷Katugu saraga wɔfɔ wi daga mbe pɔ ki na, mbaa leeple pe nari pe Yenjɛle li jen. Pa pe maa paan wa wi yeri na nagawa senre ti yewe, katugu wi yen Yawe Yenjɛle na yawa pi ni fuun fɔ li pitunŋɔ.

⁸«Een fɔ yoro wo na, yè laga kono jenne li na. Yè lelegere kan, a pè punjɔ ye nagawa senre ti ni. Yɔn finliwe mba pila le Levi wi ni, a yòo jɔŋɔ. Yawe Yenjɛle na yawa pi ni fuun fɔ, lo lì yo ma. ⁹Ki kala na, mi fun mi yaa ti ye kala li leeple pe ni fuun pe mbɛn, konaa paa ye tifaga. Kì kaa pye ye woro na tanri na kondɛgele li na, een fɔ, a yaa cɔnrɔwɔ piin na nagawa senre ti wogo na we[†].»

^{†2.3:} Mbe yala Yenjɛle li lasiri wi ni, paa daga mbaa saara yaayoro ti fire ti sori kasɔn ni, wa paara yinre censaga ki puŋgo na; Eki 29.14; Levi 4.11-12. Kì yaa pye ndee saraga wɔfenne pe sila kaa na tanri ki ŋgasele li na, maga kan saara tila pye fyɔŋɔ ni. Saraga wɔfenne pe yaa ka tɔngɔ mbe wo wa, paa yegɛ ŋga na pe ma yaayoro fire ti sogo wa paara yinre censaga ki puŋgo na.

^{†2.4:} Yɔn finliwe mba Yenjɛle lāa le Levi wi ni, po la pye fɔ wila saraga wɔgɔtunŋɔ ki piin. Levi wo na, wila daga mbaa tanri Yenjɛle li ŋgasegele ke na cecece (Nɔmbu 3.11-13).

^{†2.5:} Nɔmbu 25.12.

^{†2.9:} ŋga kì yo fɔ: *Ye yen na cɔnrɔwɔ piin na nagawa senre ti wogo na*, ko kɔrɔ wo yen fɔ ye daga mbaa tanri lasiri wi na yegɛ ŋga na, ye woro na ko piin; een fɔ ye yen na leeple woo leeple ni yegɛ ŋga na pe daga mbaa tanri wi na.

**Yerewe senre nda tìla kan
nambala mbele pe maa tara
ta yegé jeele pori mbele pe maa
yarisunndo gbogo**

¹⁰ We ni fuun we woro to nuñgba piile wi le? Yenjèle nuñgba lo ma li we da wi le? Yingi na, a we nee kambasinje piin we yee na, nee we teleye pe yon finliwe pi jogo? ¹¹ Zhuda tara woolo pe yen leelee mbele pee taga pe na. Pè katijaanga pye laga Zheruzalemu ca konaa laga Izirayeli* tara ti ni. Kaselege ko na, Yawe Yenjèle li lajengé kpoiyi*, ko ñga ki yen mali ndanla, Zhuda tara woolo pège tege fyongo* ni; katugu pè tara ta yegé jeele pori, mbele pe maa yarisunndo ta yegé gbogo. ¹² Lere ña wila ko kagala koro piin, Yawe Yenjèle luu purò luu wò wa wi woolo pe sògòwò, poro mbele pe yen Zhakòbu setirige piile wele. Wiga ka ya mbe saraga* wò naa Yawe Yenjèle na yawa pi ni fuun fò li yeri.

**Yerewe senre nda tìla kan mbele
pe maa pe jeele jege pe yeri**

¹³ Ñga ye maa piin naa, ki ñga. Ye ma saa na yanli na yentunwo wuun wa Yawe Yenjèle li saraga wòsaga* ki na, na gbele na jen li yegé sògòwò, katugu Yawe Yenjèle lii yenle ye yarikanra ta kpe na; ye kee yaara ta kpe woro mali ndanla naa. ¹⁴ Ye maa yewe na yuun fò: «Yingi na we kee yaara tii sili ndanla naa?» Ko pan ma, katugu

màa yon fòlò* le Yawe Yenjèle li yegé sògòwò mbe koro sinje ma lefònrò sanga japoçòwò wi ni. Wìla pye ma nimbye, a màa wò. Èen fò konaa ki ni fuun, mèe koro sinje wi ni. ¹⁵ Mì yo mborò naa wo ni Yawe Yenjèle lì ye pye wire nuñgba naa jatere nuñgba? Ki wire nda tì pye nuñgba, yingi tìla jaa? Mì yo pyò tìla jaa mbe ta Yenjèle li yeri? Ki kala na, ye ye yee yingiwe jen, jaingo wa kpe ka ka pye mbasinje wi lefònrò sanga japoçòwò wi ni. ¹⁶ Katugu Yawe Yenjèle, Izirayeli woolo Yenjèle lì yo fò: «Naña mboo jò je ki yen mala mben.» Yawe Yenjèle na yawa pi ni fuun fò lì yo fò: «Lere ña wi yen ma weli wi jò wi ni, mi yen maga wogo ki panra. Ki kala na, ye ye yee yingiwe jen, yaga ka pye mbasinmbele.»

**Yenjèle lì yo li yaa pan
mbe kiti kòn li woolo pe na**

¹⁷ Ye yen na Yawe Yenjèle li yon weri ye senre ti ni. Èen fò ye nee yuun fò: «We yen nali yon weri mèlè?» Ye yen nali yon weri, katugu ye yen na yuun fò: «Ña fuun wi yen na kapege piin, ki wogo ki yen ma yon Yawe Yenjèle li yegé na. Ki lerefò wi kala li yen mali ndanla.» Nakosima ye ma yewe ma yo fò: «Yenjèle na li yen na kasinje piin, lo yen se yeri?»

Yawe Yenjèle li pilige ye

3 ¹ Yawe Yenjèle na yawa pi ni fuun fò lì yo fò: «Wele, mi yen nala pitunjo wi torogi, wi yaa sanla

kon̄ li gbegele na kan[†] wa na yegē. Yawe Yenjēle na ye yen na lagajaa, li yaa pan mbe ye wa li shерigo gbəgo* ki ni mbe ye fo. Pitumjɔ ḥa wi yaa yon̄ finliwē* pi senre yo, a yaa wi jaa mboo yan, wi yaa pan.

² «Een fɔ ambo wi mbe ya yere wi yegē sɔgɔwɔ wi panmbilige? Na wiga ka pan mboo yee naga, ambo wi mbe ya koro wa wi yeresaga? Katugu ki yaa ka pye paa kasɔn ḥga warifuwe yanfɔ wi ma warifuwe wi yan wa ki ni ki yen, paa paara jogofɔ wi taflan ḥga ki ma paara ti jogo mari laga ki yen. ³ Wi yaa ka pan mbe cen mbe warifuwe wi yan, mboo pye kpoyi*. Wi yaa ka saraga wɔfenne*, Levi setirige piile* wele, pe pye kpoyi mbe pe laga, paa yegē ḥga na pe ma warifuwe naa te wi pye kpoyi we. Kona, pe yaa kaa saara woo Yawe Yenjēle li yeri mbe yala ti wɔlɔmɔ pi ni. ⁴ Kiga pye ma, Zhuda tara woolo naa Zheruzalemu ca woolo pe yaa la paan yarikanra nda ni Yawe Yenjēle li kan, ti yaa li ndanla paa yegē ḥga na faa kila pye we, yegelē ḥgele kè toro faa ke ni.

⁵ «Mi yaa pan ye kɔrɔgɔ, jaŋgo mbe kit̄ kɔn ye na. Mi yaa fyeele mbe sereya yo lekaala pe na, naa jataala pe na, mbe sereya yo mbele pe maa yagbogowo wuguro piin pe na, naa mbele paa la pe tunmbyeele pe sara wi kaan pe yeri pe na, naa mbele pe maa nangunjaala naa

pijiriwele pe jɔlɔ pe na, mbe sereya yo mbele pe maa nambannjeenle pe jeregi konaa mbele paa la fye mi ḥa Yenjēle na yegē pe na.» Yawe Yenjēle na yawa pi ni fuun fɔ lo lì yo ma.

Leele pe daga mbe laga pe kapere ti na mbe sɔngɔrɔ mbe pan Yenjēle li kɔrɔgɔ

⁶ «Muwi mi yen Yawe Yenjēle le. Mi se kanjga fyew[†]. Ko kì ti yoro Zhakɔbu setirige piile, ye fa tɔŋɔ mbe wɔ wa.» ⁷ Yawe Yenjēle na yawa pi ni fuun fɔ lì yo fɔ: «Maga le wa ye tɔleye pe sanga wi na, yè laga na kondegenjèle ke na. Ye woro na tanri ke na. Ye sɔngɔrɔ ye pan na kɔrɔgɔ, pa mi yaa sɔngɔrɔ mbe pan ye kɔrɔgɔ. Een fɔ ye nee yuun fɔ: «We yaa sɔngɔrɔ mbe pan mele?» ⁸ Lere mbe ya Yenjēle li yu le? Ma si yala, ye yen nala yuun. Kona, a ye nee yewe na yuun fɔ: «We yen nɔɔ yuun mele?» Ye yen nala yaga* naa na yarikanra ti yuun.»

⁹ Yawe Yenjēle na yawa pi ni fuun fɔ lì yo fɔ: «Danga yen ye wogo, katugu ye cenle woolo pe ni fuun paa na yuun. ¹⁰ Yaa paan yaga wi ni fuun wi ni, yaa wi teri wa shерigo gbəgo yarijende tegesaga ki ni, jaŋgo yaakara mbaa taa wa na go ki ni. Ki pyelɔmɔ pi na, yanla wa ye wele, na mii naayeri wegele ke yengé ye kan mbe duwaw tirige ye na, ḥa wi se jen mbe kɔ, fɔ ye se

[†]3.1: Mati 11.10; Maki 1.2; Luki 1.76; 7.27.

[†]3.6: ḥga kì yo fɔ: *Mi se kanjga fyew*, ko kɔrɔ wo yen fɔ Yenjēle li yaa koro yon̄ finliwē na Zhakɔbu setirige piile pe ni, ali mbege ta pe woro ma sin.

tegesaga ta ti ni fuun ti na[†]. Yawe Yenjèle na yawa pi ni fuun fɔ lo lì yo ma.¹¹ Mi se ti yarijɔgɔrɔ mbe gbɔn ye yarilire ti na. Ti se kaa ye keere yarilire ti jogo naa. Ye eεezεn* tire ti se ka koro mbasende. Yawe Yenjèle na yawa pi ni fuun fɔ lo lì yo ma.¹² Tara sannda pyew ti woolo pe yaa kaa ye yinri duwaw piile, katugu ye tara ti yaa ka pye mbe tanla.» Yawe Yenjèle na yawa pi ni fuun fɔ lo lì yo ma.

Pilige ñga Yenjèle li yaa kali kasinjɛ ki naga

¹³ Pa Yawe Yenjèle lì yo yeeñ fɔ: «Ye yen na senpere yuun na na. Eεn fɔ ye nee yuun fɔ: ‹Yingi senpere waa yuun ma na?›¹⁴ Yège yo ma yo fɔ: ‹We yen na tunjgo piin Yenjèle li kan jaga. We yen na tanri Yawe Yenjèle na yawa pi ni fuun fɔ li kondεgεŋgεlε naa li ñgasegele ke na, na gbele li yegε sɔgɔwɔ mbege naga fɔ wè laga we kapere ti na, yingi tɔnli we ta wa ki ni?›¹⁵ Ki kala na, koni ye yen naga jate ma yo mbele pe maa pe yee gbogo, ferewe yen pe woo, mbele pe yen kapere pyefenne poro paa yɔngɔ na kee yegε. Eεn fɔ pe yere ma Yenjèle li wa ma wele, yaraga ka nee pe ta.»

¹⁶ Ki pye ma, mbele pe maa fye Yawe Yenjèle li yegε, a pè si para pe yee ni. A Yawe Yenjèle lì si nujgbolo jan ma logo pe yeri. A pè si sewε wa yɔnlɔgɔ li yegε sɔgɔwɔ ma mbele pe maa fye li yegε konaa

nali mege ki gbogo pe mere ti le wa wi ni, jaŋgo laa jatere piin pe na.¹⁷ Yawe Yenjèle na yawa pi ni fuun fɔ lì yo fɔ: «Pilige ñga mì kɔn ma tege, pe yaa ka pye na woolo ki pilige ki ni. Mi yaa ka pe yinriwe ta paa yegε ñga na tofɔ maa wi pinambyɔ yinriwe taa, wo ña wi maa tunjgo piin wi kan we.¹⁸ Kona ye yaa kaga yan naa fɔ lesinjɛ wo naa lepee wi ni pe yen ma jen ma wɔ pe yee ni, ña wi maa tunjgo piin Yenjèle li kan konaa ña wi woro na tunjgo piin li kan pe yen ma jen ma wɔ pe yee ni.»

Yenjèle li pilige ki yen na paan, ñga ni li yaa kiti kɔn

¹⁹ Yawe Yenjèle na yawa pi ni fuun fɔ lì yo fɔ: «Ye wele, pilige ka wa na paan. Ki yen ma tijanga paa yira kasɔn gbɔgɔ yen. Ki pilige ki na mbele pe maa pe yee gbogo pe ni fuun naa lepeepe pe ni fuun pe yaa ka pye paa yan waga yen. Ki pilige ki na pe yaa ka sogo mbe kɔ pew, fɔ njige nakoma njego ka kpε se ka koro pe kan.²⁰ Eεn fɔ, yoro mbele ye maa fye na mege ki yegε, na kasinjɛ ki yaa pye paa yɔnlɔ yen mbaa yinrigi ye na, ñga ki yanwa pi yaa la ye sagala. Kona ye yaa pye leseele mbaa yeni la kanni nayinme ni paa yegε ñga na napire ti kaa yinrigi wa na nangbongo ki ni ti maa ki piin we.²¹ Pilige ñga ni mi yaa kanla yawa pi naga, ye yaa

[†]3.10: Levi 27.30; Nɔmbu 18.21-24; Dete 12.6; 14.22-29; Nehemi 13.12.

kaa lepeele pe tangala[†], pe yaa pye paa gbanjban yen wa ye tɔɔrɔ ti nɔgo.» Yawe Yenjelé na yawa pi ni fuun fɔ lo lì yo ma.

²² «Lasiri* senre naa kondegengelé konaa kakɔnndegengelé ŋgele mì kan na tunmbyee Moyisi wi yeri wa Horebu[†] yanwiga ki na, ti pye Izirayeli* wooo pe ni fuun pe woro, yaa nawa tuun ti na.

²³ «Ye wele, mi yaa na yɔn senre yofɔ Eli*[†] wi torogo wa ye yeri sanni mi ŋa Yawe Yenjelé na piligbɔgɔ ki sa gbɔn, ko ŋga ki yen fyere gbɔrɔ pilige we. ²⁴ Wi yaa ka teele poro naa pe piile pe sɔgɔwɔ pi gbegele, mbe piile poro naa pe teele pe sɔgɔwɔ pi gbegele[†], jango mi ka ka pan mbege tara nda ti jɔgɔ pew.»

[†]3.21: *Ye yaa kaa lepeele pe tangala:* Ko senre nda to yen naga nari ma yo pe yaa ka fanjga ta lepeele pe na.

[†]3.22: Horebu yanwiga ko pe maa yinri fun Sinayi yanwiga ye (Eki 3.1).

[†]3.23: Yenjelé yɔn senre yofɔ ŋa wi senre tì yo laga ki laga ŋga ki ni, wi yaa pye Eli wa yege wi wo. Ko kɔrɔ wo yen fɔ Yenjelé yɔn senre yofɔ wawi, ŋa wi tunjgo ki yaa pye mbe taanla Eli wogo ki ni. Ki yaa pye ko Yenjelé yɔn senre yofɔ wo senre tì yo wa go 3.1 laga ki ni. Zhezu wìla ki yo maga filige fɔ ki Yenjelé yɔn senre tìla ti yee yɔn fili wa Zhan Batisi wi panga ki ni (Mati 11.14; 17.10-13; Maki 9.12; Luk 1.17; Zhan 1.21).

[†]3.24: Luk 1.17.